

四庫全書

集部

欽定四庫全書

集部

升菴集卷六十六

七

詳校官監察御史<sub>臣</sub>劉芬

中書<sub>臣</sub>劉源溥覆勘

總校官原任中允<sub>臣</sub>王燕緒

校對官學正<sub>臣</sub>李巖

謄錄監生<sub>臣</sub>杜文海

欽定四庫全書

升菴集卷六十六

明 楊慎 撰

蜀牋川筆川墨

蜀牋自唐已名天下予脩蜀藝文有蜀牋譜一篇近觀  
龍川集陳同甫與朱元晦書云川筆十枝川墨一挺蜀  
人以為絕品則蜀人之筆墨在宋以為絕品不知何時  
降為眉州大邑之濫惡耳

鼓冰紙

敲冰紙剡所出也張伯玉蓬萊閣詩敲冰呈好手織素  
競交鸞注越俗競誇敲冰紙剡水清潔山又多藤楮以  
敲冰時製之佳蓋冬冰也

十樣蠻牋

韓浦詩曰十樣蠻牋出益州成都古今記載其目曰深  
紅曰粉紅曰杏紅曰明黃曰深青曰淺青曰深綠曰淺  
綠曰銅綠曰淺雲凡十樣又有松花金沙流沙彩霞金  
粉桃花冷金之別即其異名又蜀志載王衍以霞光牋

五百幅賜金堂令張蠙霞光即深紅牋也又有百韻牋  
以其幅長可寫百韻詩為名其次學士牋則短於百韻  
焉

蜜蒙花紙

蜜香紙以蜜香樹皮葉作之微褐色有紋如魚子極香  
而堅韌水漬之不潰爛晉太康五年大秦國獻三萬幅  
帝以萬幅賜杜預令寫春秋釋例疑今之蜜蒙花也其  
皮可作紙

蠲紙

古有蠲紙以漿粉之屬使之瑩滑蠲之為言潔也詩古  
蠲為饒周禮宮人除其不蠲蠲紙之名義取此劉績罪  
雪錄謂蠲紙起於五代民間有因親疾剗股親喪廬墓  
規免州縣賦役歲給蠲符以蠲免之號為蠲紙非也

養紙芙蓉粉

養紙芙蓉粉

薛濤事

薰衣豈蔻香

霍小玉事

古製墨法

古墨法云煙細膠新杵熟烝勻色不染手光可射人又  
曰虬松取烟鹿膠相揉九蒸回澤萬杵力扣光可照人  
色不染手造墨惟膠為難古之妙工皆自製膠法取新  
解牛革及筋全用之牛革取其厚處連膚及毛皆割不  
用入治成膠即以和煙若冷定重化則已非新矣今之  
膠材皆牛革之棄餘故雖號廣膠去古膠法猶遠無怪  
乎墨品之下也徽墨今名第一者上比潘谷蔡瑄中間  
猶容十許人況李廷珪乎

朱萬初墨

元有朱萬初善製墨純用松烟蓋取三百年摧朽之餘  
精英之不可泯者用之非常松也天歷乙巳開奎章閣  
揀儒臣親侍翰墨榮公存初康里公子山皆侍閣下以  
朱萬初所製墨進大稱旨得祿食藝文館虞文靖公贈  
之詩曰霜雪摧殘澗壑非深根千歲斧斤違寸心不遂  
飛烟化還作玄雲繞紫微蓋紀茲事也又曰萬初之墨  
沉著而無留跡輕清而有餘潤其品在郭北父子間又



跋其後曰近世墨以油烟易松烟姿媚而不深重萬初  
既以墨顯又得真定劉法造墨法於石刺中以為劉之  
精藝深心盡在於此必無誤後世因覃思而得之余嘗  
謂松煙墨深重而不姿媚油煙墨姿媚而不深重若以  
松脂為炬取煙二者兼之矣宋徽宗嘗以蘇合油搜煙  
為墨至金章宗購之一兩墨價黃金一斤欲倣為之不  
能此謂之墨妖可也

玉泉墨畫眉墨

南中楊生製墨不用松煙止以燈煤為之名玉泉墨又  
金章宗宮中以張遇麝香小御團為畫眉墨○余謂玉  
泉之名與燈煤無干只以東坡佛幌輕烟為名豈不奇  
絕

松墨

古墨惟以松煙為之曹子建詩墨出青松烟筆出狡兔  
翰唐詩輕翰染松烟東坡詩但徠無老松易水無良工  
小說載王方翼燎松丸墨富家聞見錄云唐李超易水

人與子廷珪亡至歙州其地多松因留居以墨名家仇  
池筆記真松煤遠烟自有龍麝氣世之嗜者如滕達蘇  
浩然呂行甫暇日晴暖研墨水數合弄筆之餘乃啜飲  
之又云三衢蔡瑄自煙煤膠外一物不用特以和劑有  
法甚黑而光近世稱徽墨率用桐油煙既非古法墨成  
亦用漆為衣始光東坡云光而不黑索然無神氣亦復  
安用殆此等耶予得墨法於異人祇用煙膠成即光如  
漆名之曰一品玄霜殆不虛也

藏墨訣

贈君烏玉玦泉清硯須潔避暑懸葛囊臨風度梅月

香與墨同關紐

邵安又與朱萬初帖云深山高居爐香不可缺退休之  
久佳品乏絕野人為取老松柏之根枝葉實共擣治之  
斫楓枋鼻和之每焚一九亦足助清苦今年大雨時行  
土潤溽暑特甚萬初致石鼎清晝香空齋蕭寒遂為一  
日之供良可喜也萬初本墨妙又兼香癖蓋墨之與香

同一闕紐亦猶書之與畫謎之與禪也

筆經

劉向說苑王滿生說周公籍筆牘書之則周公時已有筆矣韋誕筆經曰製筆之法桀者居前羲者居後強者為刀慥者為輔參之以榮束之以管固以漆液澤以海藻濡墨而試直中繩勾中勾方員中規矩終日握而不敗故曰筆妙又柳公權一帖云近蒙寄筆深慰遠情但出鋒太短傷於勁硬所要優柔出鋒須長擇毫須細管

不在大副切須齊副齊則波掣有馮管小則運動省力  
毛細則點畫無失鋒長則洪潤自由此帖論筆之妙頗  
盡故穉書之

澄泥硯

絳縣澄泥硯縫絹袋置汾水中踰年而設取則泥沙之  
細者已入袋矣陶以為硯水不涸

方城硯

方城硯出方城縣葛仙公巖內石如玉瑩如鑑光著墨

如澄泥發墨生光如漆如油有艷不滲歲久不乏常如新成

論詩畫

東坡先生詩曰論畫以形似見與兒童鄰作詩必此詩定知非詩人此言畫貴神詩貴韻也然其言有偏非至論也晁以道和公詩云畫寫物外形要物形不改詩傳畫外意貴有畫中態其論始為定蓋欲以補坡公之未備也

畫家四祖

畫家以顧陸張吳為四祖顧長康陸探微張僧繇吳道玄也余以為失評矣當以顧陸張展為四祖展展子虔也畫家之顧陸張展如詩家之曹劉沈謝閻立本則畫家之李白吳道玄則杜甫也必精於繪事品藻者可以語此

畫家三靄

沙門元靄蜀中人寫真染色以一小石研磨取色蓋覆



肉色之上後遂如真又有李靄之居金波亭號金波處士又有王靄謂畫師三靄

漢畫

王應麟云曾子固跋西狹頌謂所畫龍鹿承露人嘉禾連理之木漢畫始見於今邵公濟謂漢李翁王稚子高貫方墓碑刻山林人物乃知顧愷之陸探微宗處士輩尚有其遺法至吳道玄絕藝入神始用巧思而古意稍減矣今於盤洲所集隸圖見之慎又按王象之輿地紀

勝碑目載夔州臨江市丁房雙闕高二丈餘上為層觀  
飛簷車馬人物又刻雙扉其一扉微啟有美人出半面  
而立巧妙動人又雲陽縣漢處士金延廣母子碑初無  
文字但有人物漢畫之在碑刻者不止如應麟所云而  
已

周昉畫

東坡詩書生老眼省見稀畫圖但怪周昉肥畫譜亦言  
周昉畫美人多肥蓋當時宮禁貴戚所尚子謂不然楚

辭云豐肉微骨調以娛又云豐肉微骨體便娟便是留  
佳麗之譜與畫工也蓋肉不豐是一生色髑髏肉豐而  
骨不微一田家新婦耳

曹吳

北齊曹仲達畫人物衣服緊窄唐吳道子畫衣服飄舉  
時人語曰吳帶當風曹衣出水

張僧繇

劉子玄曰張僧繇畫羣公祖二疏圖而丘士有著芒屨

者閭立本畫昭君圖婦女有著帷帽者夫芒屨出於水鄉非京華所有帷帽起於隋代非漢宮所作以此言之畫非博古之士亦不能作也

又

吳道子始見張僧繇畫曰浪得名耳已而坐卧其下三日不能去庾翼初不服逸少有家雞野鷺之論後乃以為伯英再生蓋絕藝必審觀而後論定也

杜詩入畫

杜詩花遠重重樹雲輕處處山畫本可作

桃源圖

唐人畫桃源圖極為工妙舒元興作記云煙嵐草木如帶香氣熟視詳玩自覺骨裏青玉身入鏡中韓退之亦有桃源圖蓋題此畫也予及見元人臨本

拂林圖

宣和畫譜中拂林圖或作佛林又作拂菻不知所謂後考杜環經行記拂林在苦國西一名犂靬其人顏色白

婦人皆服珠錦善織絡琉璃妙天下  
蓀音力甚切董北苑畫跋云拂林圖自唐有之  
其人類中國婦人皆衣邊綾紺文雜錦戴金花步搖綴以木難青珠  
盧肇雙柘枝舞賦云拂蓀妖姿西河別部  
蓋如唐人之胡旋女元未之天魔隊耳

山林窮四和

山林窮四和香以荔枝殼甘蔗滓乾柏葉黃連和焚又或加松毬棗核梨皆妙

畫似真真似畫

慎少時先太師與瑞虹龍崖二叔父看畫因問二叔父  
曰景之美者人曰似畫畫之佳者人曰似真孰為正慎  
對曰元微之有詩云顛倒世人心紛紛之公是真賞畫  
不成畫賞真相似丹青各所尚工拙何足恃求此妄中  
情哀哉子華子龍崖曰詩亦未見佳慎爾可試作之遂  
呈稿曰會心山水真如畫巧手丹青畫似真夢覺難分  
列禦寇影形相贈晉詩人二叔父喜曰只此四句大勝

前人近病中追憶往事記而筆之祇二三首耳

弘治己未升菴

時年  
十二

印色

印色古方用草麻油或用煎糲油皆未為佳近傳用川山甲油取其不滲試之良妙

正色間色

五行之理有相生者有相尅者相生為正色相尅為間色正色青赤黃白黑也間色綠紅碧紫流黃也木色青



故青者東方也木生火其色赤故赤者南方也火生土其色黃故黃者中央也土生金其色白故白者西方也金生水其色黑故黑者北方也此五行之正色也甲巳合而為綠則綠者青黃之雜以木尅土故也乙庚合而為碧則碧者青白之雜以金尅木故也丁壬合而為紫則紫者赤黑之雜以水尅土故也此五行之間色也流黃一作駢黃

閒色名

青赤黃白黑五方正色也碧紫紅綠流黃五方之間色也青別為蒼赤別為朱析朱為非非今作緋黃別為黔白別為縞黑別為玄此正色之別名也近黑曰弋今作默似綠色曰校女嫁者服之穀日出色也柳日入色也蔥瞋色也檀婦人注面赭色也騅草色也間色之中又有間色若天縹褪紅淺絳女貞黃天水碧之類不可殫述南史輿服志有驚鵩鶉翔四色鶉音罩白色也餘未詳左傳注衾皂色也

# 丹的

釋名曰以丹注面曰的。子本天子諸侯有辟妄以次進御有月事者止不御難於口陳故注此於面灼然而識也。王粲神女賦曰施玄的結羽釵傳玄鏡賦曰珥明璫之雙照點隻的以發姿張景陽扇賦皎質皦鮮玄的點絳漢律婢變亦謂月事也。

## 鈿金

張懷瓘書錄云往在翰林見古鐘二枚高二尺許有古

文三百餘字紀夏禹功績皆紫金鈿似大篆神彩驚人  
蓋三代鈿金為篆其精類如此又李伯時得彫戈蟲鳥  
書黃金文銘六字曰王用父作彫戈鈿金法今亦不傳  
唐六典有十四種金曰銷金曰拍金曰鍍金曰織金曰  
研金曰披金曰泥金曰鏤金曰撚金曰戩金曰圈金曰  
貼金曰嵌金曰裏金而鈿金不在其中今併其名亦不  
知矣

光明砂

李德裕黃治論云光明砂者天地自然之寶在石室之間生雪牀之上如初生芙蓉紅芭未坼細者環拱大者處中有宸居之象有君臣之位光明外徹採之者尋石脉而求此造化之所鑄也儻有至人道輿者用天地之精合陰陽之粹濟以神術或能成之若以藥石鎔鑄術則疏矣光明砂今方士亦未嘗見之漫書於此以訊之好道術者

掩障

李思訓畫掩障上玄宗夜聞水聲通神佳手也

木夾

唐僖宗乾符六年嶺南節度使率譴遣徐雲虔使於南  
詔南詔驃信待雲虔甚厚授以木夾遣還通鑑釋文及  
綱目集覽皆不解木夾之義予按宣和書譜云章孝規  
嘗為路魯瞻書雲南木夾木夾彼方所謂木契蠻夷之  
俗古禮未廢故其往復移文猶馳木夾其詞畧曰萬里  
離南一朝至北開緘捧讀獎飾過多蓋其結信邊鄙使

之不敢犯義者理固如是耳

簡牘

古人與朋儕往來者以漆板代書帖又苦其露泄遂作二板相合以片紙封其際故曰簡板或云赤牘

九朽一罷

畫家於人物必九朽一罷先以上筆擬其形數次修改曰九朽繼以淡墨一描而成故曰一罷獨周忘機不假乎此落筆便成氣韻生動每語人曰書畫同一闢撥善

書人豈先朽而後書乎蓋卓識也

金題玉躑

海岳書史云隋唐藏書皆金題玉躑錦罽繡褙金題押頭也玉躑軸心也罽卷首帖綾又謂之玉池又謂之罽有毬路錦罽有樓臺錦罽有擣蒲錦罽有引首二色者曰雙引首標外加竹界而打擣其覆首曰標褙法帖譜系曰大觀帖用皂鸞鵲錦標褙是也卷之裏簽曰檢又曰排漢書武紀金泥玉檢注檢一曰燕尾今世書帖簽



後漢公孫瓚傳皂囊施檢注今俗謂之排此皆藏書畫  
職裝潢所當知也

### 九曲珠

小說云孔子得九曲珠欲穿不得遇二女教以塗脂於  
線使蟻通焉此與列子兩兒辨日事相似言聖人亦有  
所不知也珠孔本人所鑽世豈有九曲珠乎東坡祥符  
九曲觀燈詩金鼎轉丹光吐夜寶珠穿蟻鬧連宵陳簡  
齋瀑布泉詩九孔穿針可得過冰蠶映日吐寒波皆用

此事

不灰木火浣布

太平寰宇記曰不灰木俗多為鋌子燒之成炭而不灰  
出膠州予親見之其葉如蒲草束以為燎謂之萬年火  
把火浣布出蜀建昌其白如雪出於石隙元史所謂石  
絨也二物不同博物者宜知之

瑒瑒瑒

孟康曰瑒玉名也音蕩爾雅曰黃金謂之瑒說文曰瑒

金之美與玉同色者也按璽乃白金之有光如鏡又非  
銀也周禮有蕩節以竹之孚得名言白金之色如竹孚  
也字从玉與玉同色也郭知玄韻序云璽札行披則謂  
紙色如玉也應璦之名亦音璽今音暢非佩刀之飾上  
曰琫下曰琕詩云琕琫有琕毛傳曰琕刀室也琫上飾  
琕下飾天子玉琫而琕琕諸侯璽琫而璽琕璦音蕩琫  
布孔切琕音必

木難

曹子建詩明珠交玉體珊瑚間木難注引南越志云木難金翅鳥沫所成碧色珠也大秦國珎之按其形色則今東方所謂祖母綠也

玉導

南齊高祖性清儉主衣中有玉導上曰留此正是興長弊源即命擊碎之玉導未知何物又按晉書馮遷追及桓玄拔頭上玉導與之曰汝何敢殺天子以此例之則玉導者玉簪或冠篋之類耳導擇也義取擇髮然自

唐以後不聞其名

古錢

漢有厭勝錢藕心錢狀如干盾長且方而不圓蓋古刀布之變也與近世花藍夫人封綬及穿鑰錢相似見封演及李孝美錢譜

擲卦以錢

擲卦以錢自嚴君平始唐詩岸餘織女支機石井有君平擲卦錢

瓊寢玉簀

劉聰以婢為后王鑒諫曰不可以污玉簀而塵瓊寢

玉璽考

元朝元貞三十一年木華黎曾孫碩德卒其妻出古玉印貨之中丞崔彧秘書丞楊桓辨其為傳國璽上之慎按秦始皇之璽一曰皇帝壽昌一曰既壽永昌已傳疑有二矣至朱梁亡入於後唐又唐主存勗謀即位魏州僧以傳國璽獻遂即位則後唐之璽蓋有二也璽既有

二則必有一贗矣是以今日既曰與潞王從珂同焚于洛陽之玄武樓矣而他日段義又得之以為宋哲宗獻今日既曰入金與金哀宗同焚于蔡州之幽蘭軒矣而翟朝宗又得之以為宋寧宗獻若果贗而酷肖則宋徽宗正銜名受欺者又何疑其檢無螭角無缺卻之不用而別制定命寶邪贗跡在宋屢敗露矣而元之崔彧楊桓又何由得之寡婦貨物而獻之余意以為楊桓素工篆書即著六書統者必桓私刻之謀於崔彧而託名於

碩德之妻無疑崔或之意欲迎合皇太妃以翊戴成宗而為此眩耀俗目而定其位耳按通典云秦得藍田白玉為璽曰受天之命皇帝壽昌又按北齊制傳國璽鳥篆書文曰受天之命皇帝壽昌漢書注衛宏曰秦璽題是李斯書其文曰受命于天既壽永昌十國紀年晉開運末北戎犯闕少帝重貴遣其子延煦獻傳國璽于遼遼主訝其非真宋哲宗元符元年五月咸陽民段義斲地得玉璽蔡京及講議玉璽官十三員奏曰皇帝壽昌



者晉璽也受命于天者後魏璽也有德者昌唐璽也惟德元昌者石晉璽也則既壽永昌者秦璽可知蔡京輩小人媚上不憚誣天矣而況于欺人乎縱使真是秦璽亦無道之物亡國之器豈舜之五瑞禹之玄圭乎噫宋之君臣可謂迷惑無識矣

玉名詁

瑗肉倍好也璧好倍肉也環肉好若一也又曰玉空邊等也

山海經注

瓏禱早瑞玉刻為龍文也琥發兵瑞玉刻為

虎文也琤楚玉也理六寸光自照璫璵魯玉也珣齊玉也  
玢晉玉也瓊赤玉也璵碧玉也璆墨玉也璆玄玉也  
玢紫玉也璵玉半白半赤也璆玉艷色也璆彬律切青  
白玉琯也理玉膚也璞玉未理也琢玉始理也琇玉采  
也璆璵玉文也玲玉聲也璆玉光也瑜玉中美也璆玉  
加琢飾也玢璵玉點也玷玉缺瑕玉病也璆大璧也璆  
璋大八寸也璵璧大六寸也璋半圭判白也琇片玉也  
珣兩玉璵奉使玉盛之車苓間者也璆玉華相帶如琴

紆也字一作琿琿玉英羅列秩秩也瑞舜所輯玉也琿

舜所受西王母獻玉也琿夏桀寵女名刻於玉也琿周

王結好圭也靈以玉事神也琿祀天玉也

音暢人名有應琿今作平

音呼非

琿玉器也琿圭頭邪刻也琿玉飾弁也琿玉珮之

長也瑩玉垂玉飾冕也珩佩玉節步也玦玉珮不連也

琿蜃飾佩刀璫玉上天下小也璫珠不圓也琿圭長三

尺也琿火齊珠也琿水晶珠也

一名水玉

琿玉在櫝也玩兒

弄璋也琿以玉飾弁也琿以玉充耳也琿佩刀下飾也

璣玉劍鼻也璉印鼻也玼玉琯也珂以玉飾馬銜也

又曰

馬腦車渠飾銜皆曰珂玼老雕入海化為珂玼蚌屬即佛經云珂雪言其白也

車渠也璫穿耳附珠也瑁蠻女充耳玉也琢圭有凸鄂也玼江玼蚌也玲音甲蜃器也瓊馬上飾玉所謂金鏤玉瓊也琇琇瑩美石也玼玼珉石似玉也璽以玉相贈遺也玖黑色玉可作鏡也○近見文士凡遇玉偏傍之字皆謂之玉而不知各有訓詁也聊記其畧如右

升菴集卷六十六

欽定四庫全書

升菴集卷六十七

明 楊慎 撰

樓觀

樓觀本尹喜之居有草樓焉後人創立道宮名曰樓觀  
今在終南之陰盤屋縣韓翃有題樓觀詩

麗譙

莊子盛鶴列於麗譙之間注麗譙魏城門名譙亦作雉  
壯麗而雉嶢也前漢書陳勝傳戰譙門中注門上爲高

樓以望故曰譙樓慎按漢書五行志主公車大譙卒注  
大譙主問非常之人云姓名是誰何也誰何一作譙呵  
城門名麗譙者麗如魚麗之麗力支切譙即譙呵之譙  
今都門出入者守門人成列而呼喝之亦是古制不必  
改譙作譙也

申明亭

趙明誠金石錄跋昆陽城中漢街彈碑不知街彈爲何  
語按周禮大司徒里宰以歲時合耦于鋤鄭玄注曰鋤

者里宰治處若今街彈之室蓋周名鋤漢名街彈之室  
今之申明亭也

東西北第

漢世有東第所謂爵爲通侯列居東第是也有西第馬  
融作大將軍西第頌是也有北第賜夏侯嬰北第第一  
是也獨無南第蓋避南面之故歟

壁帶懸楣

陳後主起臨春結綺望仙三閣壁帶懸楣皆以沉香爲

之注壁帶壁中橫木懸楣橫木施於前後兩楹之間下  
不裝構如偏橋棧道之勢今人謂之掛楣古之殿閣今  
曰閣板禮曰始死之奠其餘閣也與西都賦曰金釭銜  
壁

綴戶綴牖

大戴禮明堂四戶八牖赤綴戶白綴牖楚辭網戶朱綴  
注綴緣也以朱緣其邊今曰四映如古紫界牆青瑣闥  
之屬



兩階

古者堂之前無階惟左右設兩階右爲賓階左爲阼階  
天子之尊亦惟兩階書曰舞千羽於兩階是也天子立  
於阼階而以賓禮延其臣易曰利用賓於王是也天地  
所以交泰也至秦中爲甬道亢然自尊天地不交而爲  
否矣今佛寺道觀猶存古制

西弄

南史東昏侯遇弒於西弄宮中別道如永巷之類也楚

辭五子用失乎家術術音閑所云弄者蓋術字之轉音耳元經世大典所云火術註即音弄

茨簷葦菴

茨簷賤士見晉書葦菴漁父見廣異記

室衡

晉書隱逸傳云徵聘之禮賁於邁軸玉帛之贄委於室衡謂室實衡門圭或從穴作室

諫雷瑣闥

諫雷

左傳 瑣聞 漢書

栢寢梧臺

唐韓翃青州詩栢寢寒蕪變梧臺宿雨收栢寢見晏子  
春秋梧臺伏琛齊地記曰臨淄有梧臺里皆齊事也

函道局室

戴延之西征記函道道如封函也荀子云局室蘆簾局  
室室如碁局也

紫壇

漢行宮用紫泥為壇

齊梁郊祀歌所謂紫壇也

天神下若流火

漢書所謂

神光交錯於薦幣之夕也

舞女三百人

漢志所謂偽節女樂也以此祭天不亦媒乎

### 鑿翠流丹

開窓鑿翠

杜詩鑿翠開戶牖

飛閣流丹

王勃

### 槐衙

中朝故事云天街兩畔槐木俗號為槐衙曲江池畔多柳亦號為柳衙以其成行排立也

### 顧雲嵩山隱居

曙景張屏掛清光於露壑飛流界練貫幽響於風湍作

隱居  
對

### 虎門

蔡邕勸學篇云周之師氏居虎門今之祭酒也漢曰虎  
觀取此義

### 甘泉宮

甘泉宮有三秦之甘泉宮在渭南隋之甘泉宮在鄠漢  
之甘泉宮在馮翊雲陽縣戰國策范雎說秦王曰大王

之國北有甘泉谷口秦二世造甘泉宮雲陽記云谷口  
去雲陽宮八十里流潦沸騰飛泉洒激兩岸峭壁孤豎  
橫盤凜然凝沍每入穴中朱明盛暑當晝暫暄涼秋晚  
候繻袍不暖所謂寒門也漢世以爲避暑之處劉歆甘  
泉宮賦云軼陵陰之地室過陽谷之秋城回天門而鳳  
舉躡皇帝之明庭冠高山而爲居乘崑崙而爲宮梁劉  
孝威詩漢家迎夏畢避暑甘泉宮校尉烏桓騎待制樓  
煩方後旌遊五柞前茹度九峻才人豹尾內御酒屬車

中輦回百子閣扇度七輪風鳴鐘休衛士披圖召後宮  
材官促校獵涼秋戲射熊

閭廬

閭閻一作閭廬省門從戶也儀禮又作廬以盥而去血  
也

宏竇

宏竇屋深響也如空谷之傳聲詩所謂嘖嘖其冥賦所  
謂蟪蛄飛而生風尺蠖連而成響也

柴門

晉書儒林傳贊清貞守道抗志柴門詩人多用柴門字

原出於此

漢書漢中之俗蓬戶柴門食必魚肉

椒圖

龍生九子不成龍各有所好竊竊鵠吻之類也椒圖其形似螺螄性好閉故立於門上詞曲門迎駟馬車戶列八椒圖人皆不能曉今觀椒圖之名亦有出也見菽園雜記又按尸子云法螺蚌而閉戶後漢書禮儀志殷以



水德王故以螺著門戶則椒圖之似螺形信矣

搯頭護朽

唐韵搯音塔柱搯頭也今俗名護朽陸文量菽園雜記引博物志蚘蚘其形似龍而小性好立險故立於護朽上則護朽之名亦古矣

延鷺堠畫烏亭

余舊有紀行詩山遮延鷺堠江繞畫烏亭上句用元魏改官制以候望官爲白鷺取其延望之意其時亭堠多

刻鷺像也下句用漢明帝起居注明帝巡狩過亭障有  
烏鳴亭長引弓射中之奏曰烏烏啞啞引弓射洞左腋  
陛下壽萬年臣爲二千石帝悅令天下亭障皆畫烏焉  
二事頗僻故須詮詰

麗矚

南史隱逸傳桂山簞渚非止素玩碧澗清潭翻成麗矚  
宋人有以麗矚名亭本此

七娥房

東哲玄居賦夕宿七娥之房朝享五鼎之食方言吳有  
泰娥之臺泰即七字七林有七娥三祭百媚千嬌之語

### 南漪

坡詩中有南漪亭詠南漪之名甚奇昔有人讀晉書坡  
公問曰尋得幾個好亭名名佳者亦自難得也

### 袁準駁蔡邕

蔡邕明堂論云太廟太室明堂太學辟雍名異而實同  
袁準正論明堂宗廟太學禮之本物也事義不同各有

所爲而世之論者合以爲一取詩書放逸之文經典相似之語推而致之考之人情失遠矣宗廟之中人所致敬幽隱清淨鬼神所居而使衆學處焉饗射其中人鬼慢瀆死生交錯倖囚截耳以干鬼神非其禮也袁子之論卓矣蔡邕名儒不知何以臆撰如此果如其言則先王之明堂殆北虜之穹廬南夷之碉房先王豈爲之乎

孔明炊釜

麻城毛柱史鳳韶爲予言近日平谷縣耕民得一釜以

涼水沃之忽自沸以之炊飯即熟釜下有諸葛行鍋字  
鄉民以為中有寶物乃碎之其釜複層中有水火二字  
亦異哉瑞應圖曰丹甑不炊而自熟玉臯不汲而常滿  
近此類乎信夫孔明之才蘊固后世之神禹周公也世  
所傳划車弩雞鳴枕不一而已

### 魚椿

椿寂見切說文椿以柴木壅水也江賦椿澱為渚夾衆  
羅釜皆取魚之具蜀中有魚椿之名

蛟韃

荀子蛟韃注馬服之革蓋以蛟皮爲之韃呼見切左傳  
韃鞞鞞鞞音絢在背曰韃鞞音膚在胸曰鞞詩陰鞞  
蓋續注靳環靳者言其常處游左騃馬背上左傳如騃  
之有靳猶文作鞞變古昏字也鞞倚兩切在腹曰鞞今  
之袞肚鞞音半在後曰鞞

金蓮炬

蘓子瞻金蓮炬唐令狐綯已有之

饗餐

金臺田景延得古饗餐拱泉而垂腹羸其面而坐則人  
焉其下有若承盤者元裕之考定爲古器無疑也

象床火籠

西京雜記天子玉几冬則加絺錦以象牙爲火籠慎常  
有冬日宮詞云障風貂尾扇熅火象牙籠貂扇冬日用  
之歐陽玄詩十月都人供暖簾

流黃簾

欽定四庫全書

會稽竹簟供御號爲流黃簟唐詩珍簟冷流黃

星施

周書王會篇樓煩貢星施

施亦旌施之屬

仙人弩

史記注通天臺上有天梯仙人弩通天臺上仙人弩笑

電岩前玉女壺

菱蕤鎖

錄異記菱蕤鎖金鏤相連屈伸在人顧況詩春樓不閉



菱蕤鎖綠水迴通宛轉橋

蕭斧

通鑑礪蕭斧而伐茵蕭斧伐蕭之斧也詩云取蕭取脂  
又云彼采蕭兮

鵲鵲色胡桃文

供御炭用鵲鵲色胡桃文

見宋史

紫花墩

宋學士王珪召對蒞珠殿設紫花墩命坐

萬尺洪

陸魯望寄吳子華詩到頭江畔尋漁事織作中流萬尺  
洪洪取魚具也酉陽雜俎晉時錢塘有人作洪年取魚  
億計號萬匠洪按洪字從洪石梁絕水曰洪射洪呂梁  
洪是也洪從竹爲洪蓋以竹爲魚梁此字唐韵不收

銀蒜

歐陽六一放玉臺體詩銀蒜鉤簾宛地垂東坡哨遍詞  
睡起畫堂銀蒜珠幙雲垂地蔣捷白苧詞早是東風作

惡旋安排一雙銀蒜鎮羅幙銀蒜蓋鑄銀爲蒜形以押  
簾也元經世大典親王納妃公主下降皆有銀蒜簾押  
幾百雙

隱囊

晉以後士大夫尚清談喜晏佚始作麈尾隱囊之製今  
不可見而其名後學亦罕知顏氏家訓云梁朝全盛之  
時貴遊子弟駕長簷車跟高齒屐坐綦子方褥憑班絲  
隱囊王右丞詩不學城東遊俠兒隱囊紗帽坐彈綦

簠簋豆鋪

博古圖簠簋豆鋪同爲一類簠盛嘉膳簋盛常膳豆盛水土之品實濡物之器也禮必從豆以禮之不可廢也豐必從豆以時之不可緩也戲必從豆以交際之不可忘也鋪亦古器名有公劉鋪有天君養鋪形亦如簠但簠方而鋪圓耳漢門有鋪首正象其形乃鋪陳之義又按鋪字從金宮門銅鑲所謂金鋪也其制不始於漢三代以來有之或以葦索或以螺蚌或以金銅各隨其所

王之德今俗歲節以葦索懸門亦古意也

佛經金摩竭魚裝飾門柱

亦金鋪之象

### 鴈鼎

梁書檄文要結犬戎潛窺鴈鼎雁鼎疑用戰國策顏率求鼎難事又或用柳下惠岑鼎事則鴈字當作鴈

### 銅缸曉缸

器物款識有王氏銅缸燭錠缸與缸同如漢賦金缸銜壁唐詩銀缸斜背解明璫之類也李賀詩飛燕上簾鉤

曉虹屏中碧亦謂貴人晏眠而曉燈猶在釭也

赭繩

商君書赭繩束枉木古之匠人用赭繩即今之墨斗也

番器

詩含神霧曰番人蠻貊作器物多與中國相反書則橫行食則合伏床則交脚鼓則細腰

吹綸

漢書注齊服官有吹綸方空之目梁費昶詩金輝起遙

步紅彩發吹綸按吹綸不知何物據詩意想是婦女所  
執之物如煖扇之類沈約詩畫扇迎初暑紅輪映早寒  
庾肩吾詩粉白映輪紅元歐陽玄詞十月都人供暖簾  
可以互證梁簡文柳詩枝間通粉色葉裏映吹綸

歌案隱囊

三國志曹公作歌案卧視六朝人作隱囊柔軟可倚又  
便於歌案王維詩隱囊紗帽坐彈碁

羽觴

東哲說曲水流觴之事始於周公營洛所制引逸詩云  
羽觴隨流波此一義也班婕妤自悼賦酌羽觴兮銷憂  
注以玳瑁覆翠羽於下徹上見此義也唐詩玳瑁筵本  
此

### 三雅

東觀漢記今日歲首謂上雅壽雅酒間也魏文帝典論  
荊州牧劉表子弟以酒器名三爵上者曰伯雅中者曰  
中雅小者曰季雅隱窟雜志宋時閬州有三雅池古有



修此池得三銅器狀如酒杯各有篆文曰伯雅仲雅季雅當時雖以名池而不知爲劉表物也廣韻盥字注云酒器盥卽雅字也吳均詩聊傾三雅卮今人語曰雅量伎人送酒曰雅酒蓋本此云

### 乘石

今之上馬臺古之乘石也周禮隸僕下士二人王行洗乘石鄭司農注云王登上車之石也詩有扁斯石履之卑兮乘車之得履石惟王爲然王行洗乘石致其潔也

淮南子云周公履乘石尸子周公踐東宮履乘石唐王  
起洗乘石賦承玉趾以增麗拂袞衣而更妍洗列周經  
履合詩雅

先路

楚辭來吾導夫先路先路車名郊特牲先路三就左傳  
鄭賜子展先路子產次路

鳳盃

唐碑文瓦釜之於黃鍾饗鼎之於鳳盃器名見博古圖

鳳舳

博雅舳舻舟也舳音墨隋志有龍舟鳳舳

扁舟本作鰈舟

或問予詩人多用扁舟何處爲始予按南史天淵地新製鰈魚舟形甚狹故小舟稱扁舟六朝詩惟王由禮有扁舟夜向江頭泊之句至唐人則多用之

方麴

北史楊愔傳以方麴障面讀者不解方麴爲何語按說

文作笛蠶薄也通作曲禮記曰薄漢書周勃傳織薄曲爲業方言薄謂之曲此云方麴障面蓋竹織方扇也

車子釣

張志和漁父曲車子釣橈頭船樂在風波不用仙唐譚用之詩云碧玉蜉蝣迎客酒黃金轂轆釣魚車又云翩翻蠻榼薰晴浦轂轆魚車響釣船是其事也宋史洞庭湖賊楊么四輪激水船行如飛今失其制

重較說

詩衛風淇澳篇曰猗重較兮毛萇曰重較卿士之車孔穎達曰倚此重較之車實稱其德也周禮輿人云較兩轡上出軾者今之平隔也詩詁云車廣六尺四寸深四尺軾去輿高三尺三寸較去式又高二尺二寸較式通高五尺五寸蓋古人乘車立乘非如今人之坐也論語曰升車必正立列女傳曰立輜無輶是其明証故乘車平常則憑較若應爲敬則落手憑下式而頭得俯較在式上若兩較然故曰重較轡是兩邊植木較橫轡上轡

兩而較一說文車轡上曲銅也蓋較在軾上恐其墜故以曲銅關之古謂較爲車耳古諺云仕宦不止車生耳三國志吳童謡云黃金車班蘭耳閭閻門見天子符曲銅之說矣

蕩

禹貢瑤琨篠蕩疏曰竹濶節曰蕩周禮掌節凡邦國之使節山國用虎節土國用人節澤國用龍節皆以英蕩輔之注云蕩當爲帑謂之函器盛此節或曰英蕩畫函

也干寶曰英刻書也蕩竹箭也刻而書其所使之事以  
助三飾之信則漢中之百使符者亦取則於故事也郭  
知玄集韻序銀鈎乍閱蕩櫛行披

竹根如意碧慮屏風

齊高帝以竹根如意賜明慶符梁元帝有謝碧慮屏風

啓

亦可對虎  
頭擎囊

水龍

隋梁睿請伐陳文帝詔曰陳國未盡藩節誠須責罪興

師若命水龍終當屈水龍謂戰船也

蘭鷁

謝朓賦靡蘭鷁兮江之潏舟也

可對  
燭龍

柴轂

袁紹士無貴賤與之抗禮輜輶柴轂填接巷陌

綠鷁蔥鷁


劉楨魯都賦綠鷁蔥鷁皆舩名舩首畫此二鳥形也

唐馬鞭價重



柳宗元鞭賈云市之鬻鞭者人問之其價直五千必曰  
五萬復以五十則伏而笑之以五百則小怒以五千則  
大怒必五萬而後可此雖寓言亦必因當時鞭價而立  
說也又顧況有露青竹鞭歌曰鮮于仲道正當年章仇  
兼瓊在蜀川約束蜀兒采馬鞭聯灰煮蠟光爛然章仇  
兼瓊持上天忽見揚州北邸前祇有人還千一錢蓋言  
其物貴而價賤也然一鞭之直何至五萬而千一之錢  
猶以爲少今世雖以金玉寶珠飾之人亦誰肯以此重

價酬之者古今好尚不同如此又唐人進士絲鞭工緻  
爲宸洪武中江南富家猶有藏之者見高啓詩集



升菴集卷六十七

欽定四庫全書

集部

升菴集卷六十八

詳校官監察御史<sub>臣</sub>劉芬

中書<sub>臣</sub>劉源溥覆勘

總校官原任中允<sub>臣</sub>王燕緒

校對官學正<sub>臣</sub>李巖

謄錄監生<sub>臣</sub>杜文海

欽定四庫全書

升菴集卷六十八

明 楊慎 撰

翰林撰致語

宋時御前內宴翰苑撰致語八節撰帖子雖歐蘓曾王  
司馬范鎮皆爲之蓋張而不弛文武不能百日之蜡一  
日之澤聖人亦不之非也成化中黃編修仲昭莊檢討  
最不撰元宵詞又上疏論列以去以此得名然自是而  
後內外隔絕每有文字別開偉門有文華門仁智殿輩

每得美官甚至蠹政害人曷若仍舊之愈乎愚謂於麗語中寓規諫意如六一公玉輦經年不遊幸上林花好莫爭開君王念舊憐遺族長使無權保厥家亦何不可南唐李後主遊燕潘佑制詞云樓上春寒山四面桃李不須誇爛漫已失了春風一半意謂外多敵國而地日侵削也後主爲之罷宴填詞如此何異諫書乎工執藝事以諫况翰苑本以文章諷諫乎諸公母乃未習聲律而託爲此乎

臯比

朱子張橫渠贊勇撤臯比蓋以虎皮爲講席也按唐戴叔倫禪寺讀書詩猊座翻蕭索臯比喜接連則以臯比爲講席唐世已然矣然臯比之爲虎皮抑又有說古之世以虎皮包弓矢謂之橐橐即臯也

俗儒泥古

易曰窮則變變則通通則久禮曰禮時爲大順次之文子引老子之言曰天下幾有常法或當於世事順於天

地祥於鬼神即可正治矣又曰先王之制不宜即廢之  
末世之事善則著之故先王制禮樂而不制於禮樂制  
法而不制於法故曰可道非常道嗚呼斯言也其識時  
務達治體之深者乎後世如趙括之兵法房琯之車戰  
蘓綽王安石之周禮其法是其時非也澤廩而蒙彫虎  
之皮尸鳩而傳鷦明之羽適足增其累爾張橫渠必欲  
行井田胡致堂必欲復封建幸而不用不幸而試其敗  
塗地矣朱子猶惜其有志未就而卒亦迂矣哉甚者謂

肉刑可用民兵當立不祭墓而止祭祠不設像而止設主紛紛之議皆泥古之過也近日有謂婦女不宜傳粉弓足酒器不宜廂銀鍍金及仕甫通顯素履蕩然此又詩禮發金椎之塚獫狁衣周公之服者尤可惡哉

### 飲章

蔡邕傳一入牢獄當爲楚毒所迫促以飲章辭情何緣復聞飲猶隱却告人姓名無可對問今之匿名文書也○章懷太子注俗本不解飲字或改爲報或改爲疑並



非也

權土灰

冬至陽氣應則樂均清景長極黃鍾通土灰輕而衡仰  
夏至陰氣應則樂均濁景短極蕤賓通土灰重而衡低  
淮南子云水勝故夏至濕火勝故冬至燥燥故灰輕濕  
故灰重夏火王而云水勝水在內也冬水王而曰火勝  
火在內也人之一身可驗夏則五臟化水冬則五臟化  
火夏非水在內則焦而焚矣冬非火在內則凍而僵矣

此陰陽互藏其宅之妙也

懸榻

陳蕃初爲青州太守郡人周璆字孟玉高潔之士郡守召命莫肯至惟蕃能致焉特爲一榻去則懸之後爲豫章太守不接賓客惟徐穉來特設一榻去則懸之右二事相類蕃平生所接賓客亦罕矣○愚謂蕃亦癡矣爲郡守採一郡之風謠爲宰相以天下爲耳目若閉閣懸榻乃干木泄柳之所爲豈郡守宰相之事乎官官之禍

其及宜矣

綜理

綜機縷也所以持經而施緯使不失條理者也三蒼解詁綜理經也謂能統理衆務爲綜理漢宣帝綜核名實晉陶侃綜理微密是也○綜理經綸皆以織喻人事鹵莽滅裂皆以耕喻人事

批亢擣虛

鬪者方相亢拒則排批之使解虛者兩敵距鬪力所不

及之處擣之雖欲鬪勢不能不解○一說亢音吭所謂  
扼其吭而奪之也

飯糗

曾南豐文集引山東諺云霜淞打霧淞貧兒備飯糗蓋  
以雪淞爲豐登兆也東坡除夜雪詩春雪雖云晚春麥  
猶可種敢怨行役勞助爾歌飯糗正用此諺語王十朋  
註乃云山東人以肉埋飯下謂之飯糗此真齊東野人  
之語也

甌史

荀子大略篇流丸止於甌史流言止於智者註甌史皆  
器也揚子方言陳魏鄭宋之間謂瑩爲史甌史謂地之  
坳坎如甌史也漢舊儀顓頊有三子生而亡去爲疫鬼  
一居江水爲瘧鬼一居若水爲罔兩一居人宮室區隅  
漚史善驚小兒漚與甌通蓋傾側窳下之地邊塞之地  
有甌脫亦取窳下之義

短人

孔子家語焦僈長三尺短之極也而莊子注云務光長八寸論衡及何承天纂文云張仲師長尺二寸近於誣矣宋史呂夏卿年老身形漸縮如小兒小說載嶺南鷄窠鶴髮翁亦縮如嬰孺此非常理所格也

### 君形

淮南子畫西施之面美而不可悅規孟賁之目大而不可畏君形者亡焉君形者亡猶莊子云尊足者存也

### 閭掃

閨掃髻名亦猶盤雅墮馬之類也唐詩還梳閨掃學宮  
妝獨立閒庭納夜涼手把玉釵敲砌竹清歌一曲月如  
霜三夢記

伐國之女

李德裕云自古得伐國之女以爲妃后未嘗不致危亡  
之患何也亡國之餘焉能無怨氣其開基之先皆一時  
之傑其漬鬼獄祇愛其血食忿其滅亡故能爲厲必生  
妖美之色以蠱惑其君而危亡之晉之驪姬楚之夏姬

息媯苻堅之清河公主侯景之溧陽公主隋文帝之陳  
夫人皆是物也史蘓所謂我以男戎勝彼彼必以女戎  
勝我隋書曰興門之男衰門之女信矣杜牧集載陳希  
烈桂娘事尤異

范蠡西施

世傳西施隨范蠡去不見所出只因杜牧西子下姑蘓  
一舸逐鴟夷之句而附會也予竊疑之未有可証以折  
其是非一日讀墨子曰吳起之裂其功也西施之沉其



美也喜曰此吳亡之後西施亦死於水不從范蠡去之一證墨子去吳越之世甚近所書得其真然猶恐牧之別有見後檢修文御覽見引吳越春秋逸篇云吳亡後越浮西施於江令隨鴟夷以終乃笑曰此事正與墨子合杜牧未精審一時趣筆之過也蓋吳既滅即沉西施於江浮沉也反言耳隨鴟夷者子胥之譖死西施有力焉胥死盛以鴟夷今沉西施所以報子胥之忠故云隨鴟夷以終范蠡去越亦號鴟夷子杜牧遂以子胥鴟夷

爲范蠡之鴟夷乃影撰此事以墮後人於疑網也既又  
自笑曰范蠡不幸遇杜牧受誣千載又何幸遇予而雪  
之亦一快哉

西施

劉長卿題西施障子曰窓風不舉袖但覺羅衣輕二語  
雖太白可頡頏也

旋波移光

旋波移光越之美女與西施鄭妲同進於吳王肌香體

輕飾以珠幌若雙鸞之在煙霧

麗色

瓊英膩雪蓮蕊瑩波露濯薜姿月鮮珠彩

鄭德璘  
妾韋氏

半面

東觀漢記應奉嘗詣袁賀賀時將出行閉門造車匠於  
閣內開扇出半面視奉去後數十年於路見車匠識而  
呼之今人云半面之識本此事

武后生牙

唐類表載李近仁賀武后新牙更生表云易有四營金  
牙爲壽考之象詩具六義玉齒載神仙之謠還年而輔  
車不虧卻老而瓠犀仍出堅而不脆聞於導養之方落  
而更生得自靈飛之散乞宣示海內仍錄付史官史稱  
武后年七十盛自拂拭不覺衰耗始信夏姬之年踰七  
十而鷄皮三少猶與巫臣生女後嫁叔向杜史胡后年  
踰不惑而妖蠱若二八是三人者貴爲君配而其行乃  
花鵝梨甘之所耻而不爲然天乃祐之以誨淫之具亦

理之不可曉者

甄后

魏甄后慧而有色先爲袁熙妻曹公屠鄴令疾召甄左  
右曰五官郎將已取去孟德歎曰今年破賊正爲奴后  
乃甄會女初未嫁熙日擬昏子建其後爲文帝后以妬  
死子建思之不忘作感甄賦明帝甄出也見此賦改名  
洛神云甄氏何物一女子致曹氏父子三人交爭之如  
此

# 十眉圖

唐明皇令畫工畫十眉圖一曰鴛鴦眉又名八字眉一曰小山眉又名遠山眉三曰五岳眉四曰三峰眉五曰垂珠眉六曰月稜眉又名卻月眉七曰分梢眉八曰涵煙眉九曰拂雲眉又名橫煙眉十曰倒暈眉東坡詩成都畫手開十眉橫雲卻月爭新奇

## 翠足粉眉

劉勰云綴金翠於足跗靚粉澤於眉臆以喻失其所施

也然今之妓女金翠綴足粉澤靚眉蓋恒飾也古所謂倡優后飾猶未若今世之甚乎

黃眉黑粧

後周靜帝令宮人黃眉黑粧至唐猶然觀唐人詩詞如藥黃無限當山額又額黃無限夕陽山又學畫鵝黃半未成又雅黃粉白車中出又寫月圖黃罷其證也然溫飛卿詩有豹尾車前趙飛燕柳風吹散鵝間黃之句王荊公詩亦云漢宮嬌額半塗黃事已起於漢特未見所

出耳又幽怪錄神女智瓊額黃

弓足

墨莊漫錄考婦女弓足起於李後主予按樂府雙行纏知其起於六朝張禹山云史記云臨淄女子彈絃跣屣又云搖修袖躡利履意古已有之再考襄陽耆舊傳云盜發楚王冢得宮人玉履張平子賦云金華之鳥動趾遺光又云履躡華英又云羅襪躡蹠而容與曹子建賦羅襪生塵焦仲卿妻詩足躡花文履繁欽詩何以釋憂



愁足下雙遠遊梁武帝莫愁歌足下綵履五文章卞蘭  
美人賦金蕖承華足陶潛賦願在綵而爲履附素足以  
周旋崔豹古今注晉世履有鳳頭重臺分稍之制唐詩  
便脫蠻靴出翠帷又麗情集載章仇公鎮成都真珠  
之惑或上詩以諷云神女初離碧玉階彤雲猶擁牡丹  
鞋應知子建憐羅襪顧步褰衣拾墜釵李義山詩浣花  
牋紙桃花色好好題詩詠玉鉤陶南村謂唐人題詠略  
不及之蓋亦未之徧考也

又

六朝樂府雙行纏其辭曰新羅綉行纏足趺如春妍他  
人不言好獨我知可憐唐杜牧詩云鈿尺裁量減四分  
碧琉璃滑裏春雲五陵年少欺他醉笑把花前出畫裙  
段成式詩云醉袂幾侵魚子縵影纓長戛鳳皇釵知君  
欲作閒情賦應願將身脫錦鞋花間集詞云慢移弓底  
綉羅鞋則此飾不始於五代也明矣或謂起於妲己亦  
非

素足女

太白浣紗女詩一雙金屐齒兩足白如霜又越女詞云  
屐上足如霜不著鴉頭襪又云東陽素足女會稽素舸  
郎予嘗戲謂太白何致情迴盼此素足女再三張愈光  
戲答云太白可謂能書不擇筆矣聊記以餉一笑予嘗  
題浣女圖詩純用太白語意紅顏素足女兩足白如霜  
不著鴉頭襪山花屐齒香天然去雕飾梅岑水月粧肯  
學邯鄲步匍匐壽陵傍蓋竊病近日學詩者拘束蹈襲

取妍反拙不若質任自然耳

天苴

張儀傳苴蜀相攻注引譙周曰天苴即天巴也○苴即巴字苴曰天苴漢曰天漢棧曰天棧山名有天谷天隰石有天牙蓋言其高且險也

繚子

宋仁宗游後苑還宮索漿甚急宮嬪曰大家何不於外宣索而受渴仁宗曰吾屢顧不見繚子恐問之則所司

有得罪者嗚呼仁宗信仁矣哉近世有達官因庖丁治  
蔥不如法笞之立死復有烹羊胃欠熟斃之於獄噫一  
介書生僥倖一官而視人命如草芥不有人禍必有天  
刑亦何不思之甚哉按爾雅銀之美者謂之鐐鐐子亦  
庖人之別稱力弔切

容頭過身

漢書虞詡疏公卿異懦容頭過身蓋以猫犬喻之凡猫  
犬鑽穴頭可容身即過矣

薛越

荀子貨財粟米者彼將日月栖遲薛越之中野我今將  
畜積并聚之於倉廩賈閔甫謂李密曰民以食爲天而  
有司曾無愛惜屑越如此通鑑注屑越猶言狼籍而棄  
之也○薛說文草名相如賦薛莎青賴注薛賴蒿也越  
草也可以爲布文選焦葛升越弱於羅紈

通名刺曰謁

說文謁白也增韻訪也請見也古者請見必有辭書之

方策使將命者通名故漢有謁者袁盎傳上謁注若今通名也史記婁敬欲見漢王或使之易衣敬曰敬本衣帛則衣帛見敬本衣旃則衣旃見今舍旃褐假鮮華是矯常也不敢將命者驚而失謁謂失其通名之刺也

等身書

宋賈黃中幼日聰悟過人父師取書與其身相等令讀之謂之等身書張子野詞等身金誰能買此好光景

寒食火禁

容齋隨筆謂寒食禁火不由介推其言似矣近觀十六國春秋石勒下令寒食不許禁火後有水電之異徐光曰介推帝鄉之神也歷代所尊未宜替也宜令百姓奉之勒又令尚書定議以聞帝詎曰子推忠賢令縣介之間奉之於天下則不通矣勒從之令并州復寒食如初容齋豈未考此耶然勒禁天下寒食而至隋唐已復禁改火觀隋李崇嗣普天皆滅燄匝地盡藏烟之句及元稹連昌宮詞自注唐時京城寒食火禁以鷄羽入灰有



焦者皆罪之亦極嚴矣火禁迨今則絕不知而四時亦不改火自元人入中國鹵莽之政也然寒食不必復改火乃先聖節宣天道者可因元人而廢之乎

拍張

南史王敬則脫朝服袒裼以絳糾髻奮臂拍張武帝不悅曰三公豈宜如此敬則曰臣以拍張得三公不可忘拍張也拍張蓋手搏拚角之戲又何間拍張賦曰東方曼倩發憤於侏儒遂與火頭食子廩賜不殊載籍中說

拍張者惟此二處人亦罕知

狗脚猪腸

高澄侍宴以大觴屬孝靜帝帝不勝忿曰自古無不亡之國朕亦何用生爲澄怒曰朕朕狗脚朕○宋洪邁銅雀瓦硯銘曰元魏之東狗脚於鄴吁其瓦存亦禪千劫○銅雀硯曹操臺瓦已不可得宋人所收乃高歡避暑宮冰井臺香姜閣瓦也洪容齋銘可證余得一瓦上有香姜字又見京師人家藏一瓦有元象字元象孝靜帝

年號也○狗脚可對猪腸侯景罵韓軌噉猪腸兒

朋黨

君子有朋而無黨小人有黨而無朋易曰朋至斯孚語曰有朋自遠方來朋者君子之善類也語曰君子不黨又曰羣而不黨黨者小人之凶類也後世朋黨二字連稱以困君子名實皆紊矣

節妓

唐小說趙嘏嘗惑一美姬名青娥後爲浙帥所得嘏及

第以一詩歲之曰寂寞堂前日又曛陽臺化作不歸雲  
當時聞說沙叱利今日青娥屬使君浙帥使送歸之逢  
蝦於橫水驛姬抱蝦慟哭而絕又薛宜僚使新羅至青  
州悅一妓段東美賦詩曰阿母桃花方似錦王孫草色  
正如煙頻夢東美感疾卒於外檣至青州段真之一慟  
而卒青娥東美可謂節妓矣漢之蔡文姬陳之樂昌公  
主九原如見之豈不汗顏乎

登科故事

分甲第自興國八年王世則榜始御殿唱名自雍熙三

年梁顥榜始賜宴自太平二年呂蒙正榜始

梁顥宴於瓊林苑呂

蒙正宴於開寶寺遂為定制給金吾衛士送歸第自蔡齊榜始刻登

科錄自霍端友榜始

制策入等

宋之制策虛第一等以待伊呂之流其入等者惟蘓氏軾轍兄弟吳育范百祿李廔終宋世僅五人而蜀居其四蓋二蘓范李皆蜀人也

陳烈

陳烈御僮僕如賓客升菴曰君子恭近於禮矜莊殊序  
待僮僕如賓客待賓客宜何如也孔子與上大夫與下  
大夫不同言君在與過位不同敬此所謂泛應曲當也  
出門如見大賓使民如承大祭未出門未使民只是申  
申天天也

丘崇勉方逢辰

蛟峯方逢辰未第時率羣士易登雲扁請丘公爲之記

丘公記畧曰丹漆金碧輝煌炳麗十手爭指十目爭視  
文則文矣實安在乎堂堂之陣正正之旗空拳可以冒  
白刃乎日月却從閒裡過功名豈向懶中來此十四字  
座右銘也若文不副實非特爲諸君羞抑可爲是扁羞  
終篇千餘言父之於子師之於徒有難言者可謂法語  
之言而方公欣然受之明年舉鄉薦第一人庚戌狀元  
及第未必非激於此也余嘗作安寧鹽井碑用宋人酒  
官碑語稍策勵之諸生奮然作色願毀其碑余笑曰是

惡可與言哉噫勉之以利祿尚不自反如此況以功名道德乎督學王宜菴目之爲悍驤非過也

契丹崇儒

契丹太祖初立即祀孔子從其太子倍之請也祀孔子而黜佛尤爲高識又繪古直臣象爲招諫亦可嘉也

曾義山

元至正間瑞州上高縣有術士曾義山世居縣十五里胡蘆石畔嘗開卜肆於縣南之橋埠有瞽而丐者日過



肆前義山必禮而與之語或啖之果餌久之丐者告山曰明日有三人共一目來者有異術君宜叩之明日果有眇一目者曳杖導二瞽人過肆山隨之拜於縣北之鷓鴣洲一瞽者曰當以小撓爲誓遂以其書授山且畫沙指訣盡其秘妙其書名銀河棹山後占卜如神邑人皆知預避紅巾賊行掠無所得恨欲殺之隱匿縣西觀音閣得免遂不復行其術密藏其書於胡蘆石洞中臨終謂其子曰某月某日有劉姓過吾家取書畀之戒不

可泄後劉伯溫官江西高安果經山家其子如山言授  
之遂棄官歸青田見太祖於金陵金獻彙言小說乃云  
劉公得石匣兵書乃瞽史詞話以欺愚人者君子可信  
之而立言哉

托物起興

昔崔延伯每臨陣則令田僧超爲壯士歌然後單馬入  
陣所向無前至僧超死則不復能戰宋子京修唐書難  
二椽燭妾媵夾侍望之如神仙吳元中居翰苑每草制

誥則使婢遠山磨墨運筆措詞宛若畫此所謂托物起興仗境生法也

解連環

戰國策秦昭王嘗遣使者遺君王后玉連環曰齊多智而解此環否君王后以示羣臣羣臣不知解君王后引錢椎破之謝秦使曰謹已解矣此著書者聞其事而不詳其事謬云引錢椎破之若如此則一愚婦人能之何以稱多智而服強秦哉今按連環之制玉人之巧者爲

之兩環互相貫爲一得其闕扳解之爲二又合而爲一  
今有此器謂之九連環以銅或鍍爲之以代玉閨婦孩  
童以爲玩具而著書者云引鍍錐破之蓋傳聞其事以  
意書之亦可謂痴人矣

何法盛郭象

何法盛竊郝紹晉中興書郭象竊向秀莊子注

素女論

邊讓章華臺賦歸平生風之廣厦兮脩黃軒之要道携

西子之弱腕援毛嫱之素肘注云黃帝軒轅氏得房中之術於素女握固吸氣還精補腦留年益齡長生忘老張平子詩明燈巾粉卸設圖衾枕張素女爲我師天老教軒皇

勵學

易首聚學書始稽古孰是面牆反自誇揚於議爲橫於道不祥恥問自足畜疑滿腹難字膠口滯義張目周公爲相朝讀百篇孔子晚年三絕韋編不愧於人不畏於

天吾言老矣爾曹勉旃

書叙指南

宋浚儀任廣編書叙指南專爲尺牘設所引諸書今多  
亡逸如書集一書古人尺牘之會彙者隋經籍志即無  
其目以此知古書之不傳者何限哉書集中所引朱娥  
王姬特多婦人之文又不知其何也

聚書戒子

唐杜魚聚書萬卷每題其後云清俸寫來手自校汝曹

讀之知聖道墜之鬻之爲不孝其言似矣然而未達也  
司馬溫公云積書以遺子孫子孫未必能讀此興廢之  
常理也余嘗愛趙子昂書跋云聚書藏書良匪易事善  
觀書者澄神端慮淨几焚香勿捲腦勿折角勿以爪侵  
字勿以唾揭幅勿以作枕勿以夾刺隨損隨修隨開隨  
掩後之得吾書者并奉贈此法真達觀之言哉

積絲散繭

沈約文積絲成綵散繭騰花言女工之妙也

信使

後漢書申屠剛傳遣信人馳至長安又劉虞傳道路壅塞信命竟不得通其曰信人可信任之人劉虞傳減去人字言信人之命猶可通也晉人言尚簡省直以信爲使者余於別錄已詳之宋人語錄稱賢友爲賢亦猶此也

將無同

阮瞻曰將無同解者不一余按世說褚裒見庾亮問孟



嘉何在亮令裒自覓之裒歷視指嘉曰將無是又辛敞  
問其姊憲英曰司馬誅曹爽事就乎憲英曰得無殆就  
晉人語言務簡且爲兩可之辭將無疑辭言畢竟同也  
悟此言筌千載如面矣然不獨晉人前代有之曾子曰  
君子人與君子人也子貢曰然非與司馬遷曰唯唯否  
否皆上爲疑而下爲決以此例之思過半矣

秦首十月

秦以建亥之月爲歲首自是不師古之亂制漢之陋儒

偽造易緯云堯以甲子天元爲推術甲子爲部首起十月朔而謂泰首亥本此是其瞽說與堯典背矣宋朱震又曰連山首艮風始於不周實居西北於辰爲亥此顓頊所以首十月也是因漢儒之陋而又誣顓頊矣

羅畸

羅畸字疇爲滁州刺史或曰僻郡畸曰此歐公之醉鄉也庶子紫薇香泉萬斛以爲供給琅琊幽谷白雲千頃以爲職田何謂僻耶治僻宇植蘭十本朝襲其簪夕擷

其英携書就讀引酒對酌余謂此可謂風流太守矣

龜瘡

茄子根煎湯浴足能治龜瘡○龜瘡足跟凍瘡也

社南社址

韋述開元譜云倡優之人取媚酒食居於社南者呼之爲社南氏居於北者呼之爲社北氏杜子美詩社南社北皆春水正用此事後人不知乃改社作舍

蒞榜

唐人進士榜必以夜書書必以淡墨或曰名第者陰注陽受以淡墨書者若鬼神之迹也世傳大羅天放榜於葉珠宮故又稱莖榜李義山贈同年詩曰空記大羅天上事衆僊同日詠霓裳又放榜後必有一人下世者謂之報羅使

女郎砧

張魯之女魯浣衣於山下有白霧濛身因而孕焉恥之自殺將死謂其婢曰我死可破腹視之婢如其言得龍

子一雙送之漢水既而葬於山頂後有龍數至墓前成蹊今其墓在褒城縣又有魯女搗衣石庾信詩所云南國女郎砧也

白打錢

白打錢戲名王建詩寒食內人嘗白打庫中先散與金錢常莊詩內官初賜清明火上相閒分白打錢

銑鉞

蕭摩訶與北齊戰有西域人妙於弓矢弦無虛發摩訶

遙擲銑覲正中其額應手而斃

覲音簡唐秦瓊尤善用之

### 天轡

四海鼎沸天轡將移

袁宏與范魯書

### 不借軍持

陸放翁詩遊山雙不借取水一軍持不借草鞋也言其  
價賤不須借也古今注漢文帝履不借以臨朝漢時已  
有此名矣軍持淨瓶也出佛經賈島送僧詩云我有軍  
持憑弟子岳陽江裏汲寒流

女史

唐尚書郎入直供青縑白綾被或以錦縹爲之給帷帳  
通中枕侍史一人女侍史二人女皆選端正妖麗執香  
爐香囊護衣服唐詩春風侍女護朝衣又侍女新添五  
夜香韓退之紅梅花詩應知侍史歸天上故伴仙郎宿  
禁中皆指此也

男女小運

容齋隨筆載日者卜命以男命起寅女命起申而不知

其始余按淮南子已載其說矣而不得其解近觀太平  
廣記引王經天門子云陽生立於寅純木之精陰生立  
於申純金之精夫以木投金無往不傷故陰能疲陽也  
陰人所以著脂粉者法金之白也又陰人之情有急於  
陽然而外自收抑不肯請陽者明金不爲木屈也陽氣  
剛燥至於遇陰言氣和柔辭語畏下明木之畏於金也

夫娘

南宋蕭齊崇尚佛法閣內夫娘悉令持戒麾下將士咸



使誦經

見法琳  
辨正論

夫娘之稱本此謂夫人娘子蓋是美稱

也是時北則胡后却扇於曇獻南則徐妃贈枕於瑤光  
龜茲王女納於鳩摩羅什反以爲榮千金公主偶於淫  
毒丐僧不以爲恥後世以夫娘爲惡稱緣此東坡戲語  
有和尚宿夫娘相牽正上床云陶九成乃爲罵語蓋未  
見六朝雜說耳

錦纜華鑾

迎候賓啓云水候錦纜陸遲華鑾

續錦  
帶集

形駟

褚亮詩形駟出禁中蓋五伯戴紅帽以唱駟自唐已然  
矣宋人賀甲科給駟從歸第曰黃榜開天上形駟出禁  
中本褚亮句也

妬婦乘驊牛

元制婦人妬者乘驊牛狗部中

北齊妬婦買  
第及皂莢

升菴集卷六十八